

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U VISOKOM
Broj: 41 0 K 106484 25 K
Visoko, 15.12.2025. godine

U IME FEDERACIJE BOSNE I HERCEGOVINE

Općinski sud u Visokom, po sudiji Avdiji Avdić uz sudjelovanje zapisničara Sejdić Džemile, u krivičnom predmetu protiv optuženog DŽ.F. sina Rašida iz Vareša, zbog krivičnog djela „Nasilje u porodici“ iz člana 222. stav 1. KZ F BiH, rješavajući po optužnici Kantonalnog tužilaštva-tužiteljstva Zeničko-dobojskog kantona broj: T04 0 KT 0061969 24 od 09.05.2025. godine, nakon zaključenog glavnog javnog pretresa, održanog dana 15.12.2025.godine u prisustvu kantonalnog tužitelja Iveljić Davora i optuženog dana 15.12.2025. godine, donio je i javno objavio:

PRESUDU

OPTUŽENI: DŽ.F. , sin R. i majke Z. rođene K., rođen ... godine u S., C., nastanjen u mjestu K. bb, općina V., po narodnosti Bošnjak, državljanin BiH, JMB: ..., pismen, sa završenom SSS, po zanimanju policijski službenik (trenutno prekid radnog odnosa u ...), razveden, otac dvoje djece, vojsku nije služio, ne vodi se u vojnoj evidenciji, lošeg imovnog stanja, na socijali trenutno, osuđivan presudom Općinskog suda u Sarajevu broj: 65 0 K 875366 21 K, pravosnažna dana 06.06.2022. godine novčanom kaznom u iznosu od 500,00 KM, za krivično djelo iz člana 183. stav 1. KZ F BiH,

KRIV JE

što je,

u periodu od mjeseca oktobra 2024. godine do ... godine, na području općine V., u porodičnoj kući R.F. , u mjestu K. ... , koji živi sa suprugom A.A. i sinom N., koja lica su sa utvrđenim kombinovanim smetnjama i utvrđenim teškim metalnim poteškoćama, koja nisu sposobna brinuti se o vlastitim potrebama i koja su pod starateljstvom M.A. , svjestan svoga djela i postupaka, što je i htio, počinio je psihičko, fizičko i ekonomsko nasilje nad svojim amidžom R.F. , na način da se samovoljno doselio u kuću R., donosio i konzumirao alkoholna pića, uzimao i odnosio hranu koja nije njegovo vlasništvo, te uz prijetnje riječima „ubiću te ja, biži napolje, jebem ti boga“, izbacivao R. iz kuće, pa kada bih R. sakupio i prodao bobičasto voće „bibu“, od R. je tražio novac da mu da, a kada bi R. odbio prijetio mu je da će ga ubiti, udarao mu šamare, te je uzimao i drugi novac koji je R. imao, zbog čega je R. iz bojazni za svoj život morao napustiti svoju kuću i boraviti u neuslovnom pomoćnom objektu štali, bez hrane i osnovnih potreba za život, na koji način je nasiljem, drskim i bezobzirnim ponašanjem ugrozio mir, tjelesnu cjelovitost i psihičko zdravlje svog amidže R.F. ,

dakle, nasiljem i drskim ponašanjem ugrozio mir, tjelesnu cjelovitost i psihičko zdravlje svog amidže R.F. ,

čime je počinio krivično djelo „Nasilje u porodici“ iz člana 222. stav 1. KZ FBiH

Pa sud optuženog na osnovu istog zakonskog propisa, uz primjenu članova 41. stav 1 tačka a) 42., 43., 49. KZ FBiH,

OSUĐUJE
NA KAZNU ZATVORA U TRAJANJU OD 5 (pet) MJESECI

Na osnovu člana 212. stav 3. ZKP FBiH oštećeni R.F. se sa imovinsko pravnim zahtjevom upućuje na parični postupak.

Na osnovu člana 202. stav 4. ZKP FBiH optuženi se oslobađa plaćanja troškova krivičnog postupka i isti padaju na teret budžetskih sredstava suda.

Obrazloženje

Kantonalno tužilaštvo Zeničko-dobojskog kantona (u daljem tekstu KT ZDK), optužnicom broj: T04 0 KT 0061969 24 od 09.05.2025. godine, optužilo je Dž.F. a, zbog krivičnog djela „Nasilje u porodici“ iz člana 222. stav 1. KZ FBiH, (Službene novine Federacije BiH br. 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17), (dalje u tekstu KZ FBiH).

Optužnica je potvrđena od strane sudije za prethodno saslušanje ovog suda dana 15.05.2025. godine. Na ročištu o izjašnjenju o krivnji, optuženi je izjavio da nije kriv za krivično djelo koje mu se stavlja na teret.

Na glavnom pretresu održanom 15.12.2025.godine prije izvođenja dokaza, optuženi Dž.F. priznao je krivnju za krivično djelo „Nasilje u porodici“ iz člana 222. stav 1. KZ FBiH, a njegovo priznanje je prema ocjeni ovog suda u saglasnosti sa dokazima u koje je sud izvršio uvid i to: Zapisnik o saslušanju svjedoka-oštećenog R.F. PS Vareš broj: 08-02-12/2-207/24 od 18.12.2024. godine, Zapisnik o saslušanju svjedoka Š.F. PS Vareš broj: 08-02-12/2-208/24 od 18.12.2024. godine, Zapisnik o saslušanju svjedoka M.A. PS Vareš broj: 08-02-12/2-213/24 od 19.12.2024. godine, Rješenje Općinskog suda u Visokom broj: 41 0 Pr 104843 24 Zm od 18.12.2024. godine, Socijalna anamneza JU Centra za socijalni rad Vareš broj: 01/03-31-2129-1/24 od 27.12.2024. godine i izvod iz kaznene evidencije za osumnjičenog Dž.F. MUP Kantona Sarajevo broj: 02/5-2-03-8-2/6025 od 27.12.2024. godine.

U završnoj riječi kantonalni tužilac je izjavio da je današnje priznanje optuženog u skladu sa provedenim dokazima, zbog čega predlaže da sud istog oglasi krivim i visinu sankcije donese u skladu sa Zakonom, te da prilikom izricanja iste cijeni priznanje optuženog na glavnom pretresu, cijeni kao olakšavajuću okolnost.

U završnoj riječi optuženi je izjavio ostaje u cijelosti kod svega što je izjavio na današnjem ročištu. Iskreno se kaje, žao mu je što se to desilo, prestao je piti i daje obećanje da se to više neće ponoviti. Moli sud da ga oslobodi plaćanja troškova postupka, jer je nezaposlena osoba.

Sud je ovo priznanje krivnje optuženog ocijenio kao jasno, iskreno i nedvosmisleno ničim uslovljeno tako da je priznanje optuženog u saglasnosti sa materijalnim dokazima, naprijed navedenim, u koje je sud izvršio uvid, na osnovu čega van svake sumnje proističe da je optuženi ostvario sva bitna obilježja bića krivičnog djela koje mu se stavlja na teret krivično djelo „Nasilje u porodici“ iz člana 222. stav 1. KZ FBiH.

Po ocjeni suda optuženi je navedeno predmetno krivično djelo učinio sa direktnim umišljajem jer je bio svjestan svog djela i htio njegovo izvršenje, a sud je utvrdio da je optuženi prilikom izvršenja krivičnog djela bio uračunljiv, jer predloženim dokazima nije dovedena u sumnju mogućnost optuženog, da shvati značaj svog djela i da upravlja svojim postupcima u vrijeme izvršenja djela, te su se u njegovim radnjama stekla sva bitna obilježja bića krivičnog djela „Nasilje u porodici“ iz člana 222. stav 1. KZ FBiH.

Prilikom izricanja krivično pravne sankcije sud je cijenio optuženom kao olakšavajuću okolnost činjenicu da je priznao izvršenje krivičnog djela koje mu se stavlja na teret, čime je u mnogome doprinio utvrđivanju činjeničnog stanja i skraćanju krivičnog postupka, dok je od otežavajućih okolnosti sud uzeo u obzir samu prirodu i vrstu krivičnog djela koje mu se stavlja na teret, kao i činjenicu da je optuženi ranije osuđivan. Cijeneći utvrđene okolnosti na strani optuženog, sud je optuženom Dž.F. u, za navedeno krivično djelo izrekao kaznu zatvora u trajanju od 5 (pet) mjeseci. Po mišljenju ovog suda izrečena sankcija srazmjerna je stepenu odgovornosti optuženog i težini počinjenog krivičnog djela koje mu se stavlja na teret, te će se istom postići svrha kažnjavanja, kako sa aspekta generalne, tako i specijalne prevencije predviđena članom 42. KZ FBiH.

Na osnovu člana 212. stav 3. ZKP FBiH, sud je oštećenog R.F. sa imovinsko pravnim zahtjevom uputio na parični postupak.

Na osnovu člana 202. stav 4. ZKP FBiH, sud je optuženog oslobodio plaćanja troškova krivičnog postupka i isti padaju na teret sredstava suda.

Sudija
Avdija Avdić

PRAVNA POUKA:

Protiv ove presude dozvoljena je žalba Kantonalnom sudu Zenica u roku od 15 dana po prijemu iste, a žalba se podnosi ovom sudu u tri primjerka.